

I. Swětna statistika.

Dospołnej a najwažnišej stej přenjeje dvě wobličeni podawacej ličby serbskeho, němskeho a zhromadneho wobydlerstwa z lětow 1880 a 1884 po jednotliwych wsach a wosadach, w kotrychž Serbja sydla. Za lěto 1880 sym na swoju próstwu material wot landratstwow Wojerowskeho, Rózborskeho a Zhorjelskeho wokrjesa dostał, a to ličbu wobydleri kóždeje wsy po ludličenju 1. decembra 1880; ličbu Serbow pak móžach jenož wot Wojerowskeho wokrjesa tež z l. 1880 dostać; běše hižo bórzy po ludličenju z ličbomaj Serbow ll. 1840 a 1860 z landratskeho archiva we „Wojerowskich němskich Nowinach“ wozjewjena byla a po tamnym žórle smy ju we Łužicy 1882, str. 35 wočišćeli a tu nětko wospjetowali z porjedženjom někotrych pisařskich zmylkow. Ličby Serbow z Rózborskeho a Zhorjelskeho wokrjesa podate su hakle pozdžišo w l. 1882 a 1883 wot landratstwow zběrane; haj, Rózborske landratstwo je dla mojeje próstwy samo w l. 1884 hišće z někotrych wsow, z kotrychž žaneje ličby njeměješe, wot gmejnskich předstejićerjow sebi ad hoc dla dospołnosće swojeho zapiska ličbu Serbow žadało a mi přecelnje připóstało. Ličba Němcow hodžeše so potom z lohka wobličić.

Ličby z l. 1884 su wšitke po mojich přepytowanjach a po powěsćach swědomitych spowědowarjow wote mnje nanajwěsćišo wobličene a zestajane. Do Němcow sym wězo wšitkich ličił, kiž su z němskeho rodu, njech běchu sami abo jich starši abo wótcowje do Serbow začahli, a k tomu hišće wšěch přeněmčenyh Serbow, kotrychž džě runje jara wjele njeje. Dokelž pak su wot rodzenych Němcow mnozy, kotřiž dla stajneho wobkhada ze Serbami runje tak derje serbski kaž němski rěča, abo z najmjeńša serbski derje rozumja, sym při kóždej wsy přistajił, kelko tajkich Němcow je. Skónčnje sym wobličić, kelko procentow cyłeho wobydlerstwa Serbja w kóždej wosadze wučinjeju.

Z Wojerowskeho wokrjesa móžu hišće někotre dalše nadrobne wobličenje samych Serbow podać, ke kotrymž štož je za wujasnjenje trěbne na swojim městnje přistaju.

Na tele specialne ličby slěduja zhromadne starše a nowiše wobličjenja a skónčnje přehłady a resultaty samneho ličenja lěta 1884.